



4. maj 2026

UPA2026/169

**Naartunermi, erninermi meeravissiartaarnermilu sulingiffeqartarneq pillugu anaanaasut tamarmik sapaatip akunneranut akunnernik 40-nik erninerminnik, sapaatit akunnerini 19 ini, sionratigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allangortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Jens NapätôK', Naleraq)

Siumup sinnerlugu siunnersuut saqqummiunneqartoq aammalu Jens NapätôK'-imit saqqummiunneqartoq kiisalu Naalakkersuisut akissuteqarnerat pillugit qutsavigaagut.

Siumut tunngaviusumik isumaqarpoq: Meeqqat tamarmik pitsaasumik toqqissisimanartumillu aallartinnissaat qulakkeerneqartariaqartoq – angajoqqaat qanoq inissisimanerat apeqqutaatinnagu.

Siunnersuuteqartup tikkuagaatut naligiinnginneq piviusuuvoq. Angerlarsimasuinnaat, ilanngullugit aalisartut, piniartut aamma savaatillit ilaqutariit, ullumikkut atorfinitsitaasunut sanilliullugit "suliffilinnut" ajornerusumik atugassaqartinneqarput, ilaanarput sapaatip akunneranut akunnerit 14-t taamaallaat pissarsiarisarpai. Tamanna Siumumit ataasiarnata oqaasertalersorsimavarput. Sulinermik Inuussutissarsiutillit Kattuffiat SIK qujanaq erninermik aningaasaateqarfik pilersissimagassiuk taamaalillutik qulakkeerinneqataasinnaaneq periarfissaalersikkassiuk.

Siunnersuuteqartup tunngavilersuina Siumumiit paasisinnaalluarparput. "Sulisinnaanngitsutut" naatsorsuunneqartarnerat Siumumiit akuersaaruminaatsipparput. Aatsaat tassa naligiinnginnerujussuaq tassuunakkut ilaannut atugassaqartitsilluta.

Tamanna politikkeritut akisussaaffitsinniippoq.

Peqatigitillugu Naalakkersuisut oqariartuutaat aamma eqqumaffigisavarput. Ullumikkut aaqqissuussineq aningaasarsiat annaasat tunngavigalugit pilersitaavoq, taamaattumillu assigiinngissuteqartoqartarpoq.

Siumumiit isumaqarpugut matumani meerartaarnermi aaqqissuussineq aningaasaqarnerinnaq pineqanngitsoq kisiannili meeqqap pisariaqartitai matumani pineqarput.

Taamaattumik nalilersorneqartariaqarpoq aaqqissuussineq meeqqanut naligiinnerusunik atugassaqartitsinersoq qulakkiissallugu.

Taamaakkaluartoq Siumut isumaqarpoq siunnersuut maanna saqqummiunneqartoq naammattumik suliarineqanngilaq.



Tamarmik assigiimmik annertussusilinnik pisarnissaat eqqarsaatigalugu apeqqutinik pingaarutilinnik pilersitsivoq:

- aningaasatigut piujuartitsineq
- aningaasaliissutit qanoq atorneqarnissaat
- aammalu ikiorsiissutit qanoq sammitinneqarnissaat

Siumut aaqqiissutissanik piviusumi atuuttunik kissaateqarpoq.

Peqatigitilluguli Naalackersuisut eqqarsaatigalugit erseqqissassavarput: Misissuinissamik pilersaarutit kisiisa naammaginangillat, aammalu aatsaat ukiakkut 2027-imi iliuuseqarnissaq Siumumiit kingusiginarmat. Taamaattumik Siumumiit ersarissumik kaammattuutigerusupparput una suliaq ataatsimiisitaliami siusinnerusumi naammassineqarsinnaanissaa ugartorneqassasoq, assersuutigalugu upernaakkut 2027-imi suliaq naammassisuusangorlugu.

Ilaqutariit ullumikkut pisariaqartitsipput.

Taamaattumik Siumut isumaqarpoq pisariaqartoq:

- periarfissat sukkanerusumik paasineqarnissaat
- pisariaqartitsinerpaat siulliunneqarnissaat
- aammalu naligiinnerusumik aqqissuussinnermut ingerlanissarput.

Siumumit Naalackersuisut misissuinissamik siunnersuutaat ilaatigut paasisinnaavarput. Tassami aningaasatigut sunniutissai paasilluarnissai eqqarsaatigalugit. Kisiannili illuatungaani eqqummaariffigineqartariaqarpoq aningaasanut inatsimmi erninermi aningaasaateqarfik (barselsfond) konto pingaarneq 31.03.35 ukiuni tulluuttuni sisamani immerneqarnissaa peerneqarnikummat. Tamatumunngalu peqqutaatinneqarluni, aningaasaateqarfik naammattunik uninngasuuteqarnera aammalu aningaasat atorneqartarneri killeqarmata. Taamaattumik Siumumiit ataatsimiisitaliamiit qulaajartikkusupparput aningaasaateqarfiup sinaakkutai kipparippallaarnersut, taamaassimassappammi taava aningaasaateqarfimmi suleriaatsit aqqissuunneqarnissaat naleqqusarneqartariaqarmata.

Aammalu oqaatigissavarput aningaasaateqarfik kinguartitsinnermut atorneqassanngilaq piaartumik suliaq ingerlasariaqartoq isumaqaratta, tassami qinigaaffik manna allannguisoqassarnissaa pisariaqarmat. Taamaattumik Siumumiit piffissaliussa qeqarsaatigalugu siusinnerunissaanik piumasaqarniapugut, suliaq kinguarsarneqarsinnaanngimmat.

Siumut naatsorsuutigaa suliaq siuarsarneqassasoq, qulaajaqqusagulli ataatsimiisitaliami suliarilluarneqassasut.

Naggasiullugu oqaatigissavarput:



Pisariqartitsisut annikitsuinnarmik sulisimasut minnerunngitsumillu aalisartut piniartullu nuliaasa pisinnaatitaaffiinik annertusaaneq Siumumiit pingaarteqaarput. Tamannalu oqaasiinnaassanngimmat uumap siunnersuutip taperserneqarnissaa neriuppugut amerlanerussuteqartut timitaliiffiginissaa tapersorsorluarumaaraat.

Siumummi tassaavoq akisussaassuseqartumik ineriartortitsineq aammalu naligiisitaanermik aamma pingaartitsisoq. Kissaatigaarpummi aaqqissuussineq aningaasatigut piujuartoq aammalu inuiaqatigiinnut naapertuuttumik iluaqutaasoq.

Meeraqarneq meerartaarnerlu soqutiginarsartariaqarparput, meerartaarneq pileriartuusariaqarpoq. Oqaaseq "meeraqarneq akisuallaarpoq" qimallugu aaqqissuussiniarta, meeqqeriveqarnermut tunngasunik angajoqqaanngorlaanut artukkijunnaarluta oqilisaassisariaqarpugut aaqqissuussinitsigut.

Piffaassaavoq massakkut piujuartitsineq pineqartillugu inuk piujuartissallugu, qanorlu amerliartornissatsinnut atukkatigullu atugarissaartitsinissatsinnut una alloriaat tiguniartigu. Angisuumik eqqarsarluta sulinerput aallartinniartigu.

Taamatut oqaaseqarluta Siumut siunnersuut ilaqutariinnermut peqqissutsimullu ataatsimiititaliamut ingerlateqqinneqarnissaa innersuussutigaarput.

Lars Poulsen, Siumut